

# ZION THUSUAK



**REVIVAL CHURCH OF GOD (RCG)**

Vol. XXVII

AUGUST 2023

No. 140



**THUPI:**

**“Mi Diabol taw kidona chu la zaw theina dingun, Pathian galvan bukim in kivan un”.**

***Ephesa 6:11***

Editor: Rev. Dr. Khupkam Vaiphei

# ZION THUSUAK

**Editor:**

Rev. Dr. Khupkam Vaiphei

**Associate Editors**

1. Rev. Liante
2. Rev. Ngulneipau

**Contributing Editors:**

1. Mr. Kh. Sang Vaiphei
2. Rev. Kailum

**Board Members:**

1. Pro Pastor Lianboi
2. Upa Khailiankham

**NOTICE**

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

*By: Editorial board ZT*

**A SUNGAH THU UM TE**

	<b><u>Page No.</u></b>
1. Editorial	01
2. Pathian chu I ki humbit nau ahi	02 – 04
3. Tichun, “a suang tapo in Lalpa chu suang tau hen” ti zik gual akhan (1 Kor 1:31)	04 – 06
4. Thina (Death)	06 – 07
5. Zakai ki hetchianna	08 – 11
6. Kochuam hi kua ah ahi em	11 – 14
7. Inkuan hinkhua ah Nute/Zite	14 – 15
8. Report chuam chuam	16 – 18
9. Pauchapna hiat ding te	18
10. Hetsakna	19
11. ZT Life Member	19
12. ZT Patron Member te	19
13. Zion Thusuak Magazine Agent List	20

*Editorial...* ✍



*Simtu dawitakte amasan Lalpa Jesu min in la leng un chibai.*

*Tuhin, 2023 August issue sua kit thei ta dinga I um thei ziakun imau eipuitu Pa Pathian chu pak in umzing ta hen. Amen.*

*Tuchung igam uh Manipur buaina thu ahin khawvel pumpi ah mizosia hiat thei tiangin buaina chu asuak dawk ta (Video hung viral zia kin), ahinla, ei mau India kumpipa Prime Minister Narendra Modi hin chu bangma lo kham ah kawi in a cham lo ah chamna hung umthei ding gual in hiatphak lo gual tuk in a thip vawng vawng maita ahi, zia haw hi I ngaitua chun Pathian thu hung guitunna ding le hung hi maimaw lo ding ahi. Pathian gam tichu mithiangtho te lakdaw na hun Rapture chu hung tung tale kisa zosa ihi na em ti hi ki ngaitua thak leu hin dawi a um ta ahi.*

**Mathai 24:44.** *“Zia zia ka chun nangmau le kisa zo sa’n um un, Mihiam chapa hi chu la ginchaklo lai tak un hung kha di ahi”. zia Bible chang apat ah zilding ka mu daw chu, tulai tak ahin imelmateu Meitei te aza ah hung kuante dou zaw theina dingah kisak lawkna leh kiginna hi eimau thingtang miten iha bawl pen u ahi dungjui in, amau Meitei te chu bang zat hung kuan in eidou maleu le Ama Pathian zal in ala kinang zou zel thei in, amau hawn thina atuak tam un tichun ei zou lo in akilekit tasek uh ahi.*

*Ziagual ma chun, I gal uh Meite te zaw na dingah kiginna inei gual ua hin, bang gual thepna hung tung in, dou ding hung um tama lele, thepna chu zo ah, Lalpa lungtuak ah kipakna I chungin ahung tun theina dingin Thagau ah Gal dou dingah kisa zosa’n um chiat thei ding in Lalpa’n simtu te zosia Thagau ah mitvakna nei chiat thei dingin hun malsawm ta hen. Amen.*

-----

---

## PATHIAN CHU I KI HUMBIT NAU AHI

By: Upa Lalboi, Gawtangkawt

“Pathian chu I kiselna leh I hatnau lungkham lai ah panpi vak ziang naicha um ahi” (Sam 46:1) tileh, “Tangten Jerusalem a ùm vel gual in Lapa chu mite kimvel in a um sek hi tu’kipat kumtuang tiang in, (Sam 125:2).

**1. PATHIAN CHU I KI HUMBIT NAU AHI:** Bible chun Pathian phat zia, kiselna leh kihumbitna ding ah bel tak ahi zia hi mun tamtak in eihlah, a thamuan um khop mai hi. A langkhat lam in kuate ahi diam uh humbit ah um sek, kuate ahi diam uh thamuang tak ah um sek te ngai tua ngai ahi.

Thuthung Lui ah chun Israelte chanchin tam tak I mu thei ua, Pathian kihumbitna ding ah mang sekte chu Israelte a hui ah, zia khawvêl ah Pathian in a hiat leh a ngaisak inkuante ahiu. Lungkhamna a tuak tam ua, gal ahau ua, gâldo ding inle a kuan dawkw deu zing sek ui, kihumbitna ding a poimaw sin ua leh a hun hun in Pathian in a humbit sek ah, mimal tak inle Pathian chun ama a ding ah ginumte chu humbit in a maljawl sek hi.

Pathian chun amite ama telchumte ngei inle haksatna a tuak uh aphal hi, lungngai leh beidawng tak ah kap leh thum hut hut ah a um uh aphal sek hi, galdo a haksat maizen tawh, galdo ding ah akipat veu sek uh ngai ding in a um sak sek hi. A haksatna mun un Pathian in a nusia ngai puai. A galdona mun ngei unle Pathian in a um pi sek ah, hatna zawna la tawh a kilekit sek ui. Melmate’n Jerusalem a um kimvel lai unle amau umvel tute ngei chun, a thawm (husa) a hiau ah, umkim vel ah umten bangma a bawl uh ngailo in, gâlthuum tawh nek leh dawn dingte nusia in, lau tak in a taimang ziang uh ahi.

Habakkuk chun a nek hawlna a ki vakna thil zosia chu chan vek ding hilehle “ka humdampa ka Pathian a chun kipâk jel ingka, a ti hial ah, a

nei sun sun a in leh lote chule ch n vek ding hilehle khawk a saklo thu a puang dawk hi.

Ama a dinga ginumte chu Pathian in a humbit sek hi. Joseph chanchin apat khan Pathian a ding ah a ginum zia I mu ah, thawkna pumpelna ding a ngaitua buai puai. Suangkul tianga khum a um in aum in ahi. Himaleh, a thawkna ah kipat khan maljawlna thupi tak a hung tung ah, a hunlai ah vaihawmtu lopi tak a hung hita ahi.

Danial leh a lawite chu meipi lak leh sakeibaknei kul ah selut ahiu. Mihing ngaitua dan achun a vaigei talua deu chu ahi sek ah, maleh Pathian lemkuat dan ah chun a thawkna mun ngei ua va umpi ah, va humbit kha ahi sek hi. Meipi sa ma ma ziang sung ah chun khawv l mite maksak di tak in a vak kual vel ua, a samjang uh pakhat cha le a kang puai

Sakeibaknei kulsung kha mun nuam chu hi kei puanna, midang a pailutteu kha tual chu manlo ah ala puaitel ua, dam ah suakcha kuama dang a um puau hi; Pathian in Danial chu Sakeibaknei kul sung inle a umpi ah a venbit ahi kha maw? Pathian in ama a ding ah ginumte chu a hepha zing ah, a humbit sek hi.

**2. LALPA CHU A MITE KIANG IN A UM SEK HI:** Pathian thu a chun Tangten Jerusalem a um vel gual un Lalpa chu amite kimvel in a um sek ti I mu kit ui. Jerusalem khua hi tang in a um kimvel ah, alailung tak a chun a khua hi a um hi. Melma ten ava do sek maleu zia Tangte ziak ah chun melmate a ding in panmun lemch ng ding a haksa, tangte chun Jerusalem khua chu a humbit sek ahi. Zia gual chet a chun gingtute hi Pathian in ei vengbit zing ahi ti I hiat u a poimaw ahi.

“ei ko in, tichun, hun dawnhu ingka” tipa chu Pathian ahia, I ko ua leh ei dawnhu ngei ngei ding ahi. Kumtuang Pathian chun a chate kona chu dawnhu lo in thipsan maim ai lo hial ding ahi, I kiang un a um zing ah, I ko phat sin ua leh hung dawnhu ding ahi.

**3. I LUNGKHAMNA LALPA'N A HIAI:** Pathian chu lungkham lai ah panpi vak ziang naicha um ahia, I ko sin ua leh ei dawnhu ding ahi aki chian hi. Khawvel ahin ama hiatlo kâl ah bangma tunglo ding ahi. Lalung kham na zosia ama chung ah septhau in aman la khankhua ding uh agel nai ti hi hezing leu hin.

Sam 73 na chun, Pathian chu kihumbitnan kamang hi athilhi zosia ka hilsawn theina dingin, a ti'n. Khawvel thil ah vaihawmtu leh thuneitu chun vengtu sepai anei ua, mi hausaten le amau vengtu ding in mi a gawi sei ua, sum leh pai tam tak aseng sek ui. Himaleh, ei uh Pathian gingtute hi chu sum senglo hial in Pathian in ei veng zing ah, buaina tak tak a hung um phat leh thuneitu leh vaihawmtuten amau vengtu sepaite chu a thamuanpi tak tak thei sek puau hi.

Himaleh, ei uh gingtute hi chu Pathian in I phat na ding un bangkim ei bawlpiak jaw sek hi. Zia khawvêl hi I khualzin nau mun uh, umna det ding hilo ahi. Zia tak latna ding ah zia gual ah sawi ah um I hi dan uh ei hil hi. Pathian in a chate a mualpho ding lampi a bawl ngai puai I lungkham nau zosiau hetu Pathian hi ko jing in, bel jing leu hin, Ama chu I ki humbit nau ahi ziak in. Aman, thil thupi tak leh I gel phaklo leh ngaitua phaklo eibol piak ding ahi ti kinem zing kawm in.

Lalpa'n simtute zosia malsawm taken, Amen.

-----

## **Tichun, “A suang tapo in Lalpa chu suang tau hen” ti zik gual ah khan (1 Korinth 1:31)**

*By: Rev. Liante Vaiphei*

Tuni, mitin in i kisanpитеu haw hi Pathian lunglam a hilo ahi ti hetthiam akûl hi. Bangziak ah mihingte hin a pilnauteu, a thiamnateu, a thahatnateu, a melphatnateu, a hausatnateu leh a dang dang haw hi a

kisuanpi lo diu ahi em? i ti leh, pilna, hatna, hauna leh thilpiak pha dang dang haw hi Pathian a ahia; chuleh ama ah kipat ahiloleh ama zal ah i chan uh ahi ziakin, ei piatu Pathian he lo ah a hem, ama zawk suang zaw lo ah a thil piak i dawnte leh thil dang i suan zawk khak diu hi Pathian lungnatna ahi.

Thuneina, thahatna, pilna/hetna leh hausatna kisuanpi te chu mumal lo ah siam in um in tiu in, chun bangma lo mai ah um in'au. Jawlnei Jeremiah chun, "*Lalpa'n zia gual ah hin a gen hi: Mipil chun a pilna suang ki hen la, mihat in le a hatna suang diak ki hen la, mihausa'n le a hauna chu kisuanpi diak ki hen; a suang nuam tapo in, Keima Lalpa hi, ngilneinate, vaihawm diknate, felnate leh zia leichung ah mangsek ka hi ti ei hetthiamnau chu suang zaw tau hen; zia chu ka lunglam ahi ngal ah, Lalpa'n a tii*" (Jeremiah 9:23-24) a ti ahi.

Khenkhat in mi dang te sang ah pil leh he kisak zawk ziakin chapona lungthim a nei ua. Bible in chu min ka hei a ti chun a het di gual in a he lo ahi a tia. Pathian in pil kisaknate leh khawvel pilna kiti te hi thil ngawlhuai a sak ahi ti hetthiam akûl hi. Khenkhat in a thuneinau a hem, a haunau a hem, ahiloleh a thahatnau a kisuanpi ziakun mi dang bang ma sim lo in chapona lungthim a nei kit uh ahi. Etsakna'n lengpa Nebukadnezar chun, "*Zia Babulon khua lopi tak hi, lengpa chenna ding ah ka thahatna leh ka lalna thupi tak suklatna ding ah ka siamdaw hilo a hem?*" ti'a, a thahatna leh lalna a kisuanpi ziakin, Pathian in a lenggam chu a chapo kum 7 sung ahiloleh a kisuang sung sia a lakman piak ta ahi. Ziabanahchun, Goliatha chu a hat ziakin a kisuang ma ma a, tichun chapo tak in a pau a, Israelte Pathian hing tiang a cho phat in, Pathian in ama suangtu David mang in a that mai ahi.

Tuchung i galteu in, thingtâng mi MLA sawmkhatte hin bang bawl dawk di a hiu em a tiu ah, i MLA sawmkhatteu hi bangma a sep puau tina a hia; zia chu a pilnau a kisuang zia uh ahi ti a kichian hi. Chuleh, Lamka khuapi zan khat thu ah chaih ding a tiu hinle, a thuneinau, a mi tam uh, a hausatnau leh a galvan matchakteu a kisuanpi zia uh ahi ti a kichian hi.

Ei uh thingtang mi Khristiante'n vang i thahatnateu a hem, i volunteerteu a hem, i galvan matchakteu a hem, mi tam lam in a hem, hetna-thiamna lam in a hem, ahiloleh i haunateu i kisanpi kei lo uh ahi. Chun, ei Kuki-Zomi-Hmar ahiloleh Zo suante i pankhawm tak ziak unle kisuangpuai tiu in. KNO leh UPF te a pankhawm ziak unle kisuang puai tiu in, chuleh i u-nau Mizoram te'n ei panpi ziak unle kisuang diak puai tiu. Ahin, ei uh u-nau, Zo suante zosia i pankhawm thei tak ziak un i kipak mamau a; zia chu Lalpa i Pathian ziak uh ahi ziak in Lalpa chu chawihawina sangpen i piau ahi!

Bible in, “*A suang tapo in Lalpa chu suang tau hen*” a ti hi he mil ngai puai tiu. Sam ziktu chun, “*Khenkhat in kangtalaite a suang ua, khenkhat in sakawlte a suang ua, ei hawn vang i kisanpiu chu Lalpa i Pathian min uh ahi. Amau chu kisui in kipuk in'au; ei haw vang tho in, ding chang ding i hui*” (Sam 20:7-8) a ti ahi. Lalpa'n ei thingtang mite'n ama bep suang zing thei ding in a thu ei malzawl piak tau hen. Amen.

-----

## “THINA” (Death)

*By: P/Pastor St.Lianboi Vaiphei*

**Thumapui:** Sermon belap ahithe i khak leh mihiamte thina chung chang chithum Bible in ei gen piak te vak suikhawm hitiu. Mihiam te chung ah thina alatung chu Bible in kichian tak in ei gen piak hi. (Heb. 9:27, Gen. 2:17; 3:19) etthei ahi.

Bible in ei gen piak dungzui in mihiamte chung in nisin hunsin in a tung zing ahi. Zia thina chithum (3) te a pat ivak etkhawm ding uh chu: **TAKSA THINA, THAGAU THINA, KUMTUANG THINA**, haw hi ahi.



Anuai ahin thina hung um dawdan vak suikhawm hitiu in, simtuten le aphant chuampi thei ngei na ding un Lalpa'n a thu hi hun malsawm ta hen.

- A. **TAKSA THINA: (Physical Death):** zia taksa thina kitihi taksa leh thagau kikhenna chu ahi (2.Timo. 4:6; 2.Cor. 5:1, Gen. 25:11) taksa leh thagau a pen hi, ahung kikhen phat leh thagau hi a pia pa Pathian kiang ah kile kit in, chuleh, taksa hi leivui ah ahung kisiam daw na a chu, kile kit ahi tai.(Gen. 3:19, Eccl. 12:7) Biblical dungzui thina itiu chu ahi.
- B. **THAGAU THINA: (Spiritual Death):** Thagau thina kiti hi thagau ah Pathian tawh kikhen na chu ahin, zia thina hi piangthak lo haw dinmun thina chu ahi.(Is. 59:2) Christa neilo/piangthaklo haw hi Pathian tawh kigui zawpna neilo/umtalo thagau ah thi ahi tau (Eph. 4:17-19) a ziak chu Adam in Pathian thu apal kek achun Pathian tawh akigui zawpna atan tak ziak a, Pathian in ahung hawl pan ahitai. Lalpa Pathian in Pawsal chu ahun ko ah, khawitak ah um la hem? Tin ahun ko chun, Pathian tawh akiguizawpna tan/umtalo ti ahilchian/a etsakna ahi mai hi. Achuti ahileh Adam chu Thagau ah thi ahi tai tina ahi. (Gen. 3:9) Zia thagau thina hi ichan lona ding un, inei sate kha kem pha tai tiu (Rev. 3:11)
- C. **KUMTUANG THINA: (Eternal Death):** Zia kumtuang thina kiti hi piangthak lo haw Pathian tawh kumtuang ah kikhen na chu ahi. Adiak ah zia lungsiatna khang/phat sung ah christa hukdam na changlo zosia chu, zia kumtuang thina hi chang ding ahui, a ziak chu zia kumtuang thina kiti hi, mihiam ten, igitlo man uleh, isep dungzui un, imuu/iki san ding uh chu ahi. (Rom 2:6-7; 6:23; Rev. 20:12-13; 21:8)

Zia thina points (3) izik te hi phatchuampi thei chiat ding in a vel in Lalpa'n athu ei malsawm piak ta hen.

-----

## **Zakai ki hetchianna (Luka 19:1-9)**

*By: Kh Sang Vaiphei*

### **I. The place/ A mun (19:1).**

Jesu Jeriko khua a lut a khan nichuang ding ah lut ahi pua, lampi hawthen gua mai a la hi (Lk. 19:1). Jeriko khua hi hausa tak leh mun poimaw tak ahi. “Tûm thing khawpi” ti ah ko inle a um in, a neinung dan genna in Josephus chun, “Palestine gam ah thaupen” ti’n a la ko hi. Rom mite chun sumkawlvai na mun in ala mang uhi. Sumkawlvaina mun ahi ziak in sedawlna mun ding a le nuam ma ma ding ahi.

### **II. Jesu tawh a kituak masang hinkhua:**

#### **1. A min genchianna (19:2).**

Zakai kiti hi “thiang (pure)” tina ahi. Himaleh, ama chu mi muda pen bawl in a la pang hi. Amin “thiang” ahi guala hin hing theilo, chawn theilo a la hi. A min phuaktu te hin chu umzia neitak a ala phuak uh chu hiding a hi. Ahinla, “thiang” hinkhua, leh lungput chu ala neizo lo in, a thianglo lam in ala gamta kha zaw tai. A nasepna mun ah sum muna bailam tak tak te, a sedawlna sum thangvel te bang in a lungthim luadim zaw in; sum leh pai tamtak nei a hausak ding bep ngaituana chun “thiang” hinkhua chu a musak zo lo ahi ding ginchat a um hi.

Zakai hi Jeriko khaw mi ahia, sedawltu mai mai hilo sedawlte hotu ahi (Lk. 19:2). Amau hunlai ah sia dawlte hi, sum negu leh diklo taka mi chung ah sia la hiding in Zakai kamsuak apat hiatthei in a um hi. Romte khutnuai ah um a hi ziak un, sedawl ah pangte hi Judate chun a muda diak un, mithep hat, a nampite zuak ah ngaw inle a um ui. Chuleh, tualthatte, guchate tawh kibang ah simkhawm ahiu.

#### **2. The Urge/Tup tintenna (19:3-4).**

Zakai hin ama gual tho ah sedawltu Matthai kha Jesu’n a lungsiat in a nungjui ding in a ko ah, a In ale ankuang a um khawm ui ti thute bang ala he ding in ginchat a um hi (Lk. 5:27-32). Amau nam sung ah sedawlte chu tualthatte, guchate tawh kibang ah simkhawm himaleu Lalpa Jesu’n a khenchuam pua a hepi tho tho hi ti bang Matthai chanchin apat ala he hi ding ahi. Ziaziakchun, Zakai kha le Jesu

munuam ten ten in theichang kung ah ala käl hi ding ahi (Lk. 19:3-4). Sedawlte hotu himaleh Jesu a munop ziak in, zachatna gello in theichang kung in ala käl hi.

Zakai kha *mi niam* himaleh, Jesu a mu nop ten ten ziak in, a hina zachatpi lo in leh mi niam ahina kingaisiatpi lo in mutheina ding lampi a hawl tun tun a, theichang kung a khan ala kal mai ahi. Jesu mu nuamte ding in paulap ding zat chuam chuam um maleh a lampi dang a bei diak puai. Zakai in officer ahina, mite chung ah vaihawm thei a kisakna, chapo taka sia a la dawl sekna lungthim kha paitha in Jesu mu a la gua, mu le a la mu ngei ahi. Zakai guala ei daltu kibang chiat lo maleh Jesu I mutheina ding un daltu/paulap I nei zosiau paithak a poimaw hi.

### **3. The Receptive Heart/lungthim kihong (19:5-6).**

Zakai hin Jesu mu nuam in kisangsalek kawm ah a theina zosia tawh Jesu mu ding in kisa maleh, mi niam ahi ziak in a mupha diak pua, mutei a nawp ziak in Jesu hungna ding lam a chun ala tai masa in theichang kung in ala käl hi. Ziaguala a buai ma ma lai a chun, “ka mi mu nawp pa hi ka In ah tunsak ingka tin, an nekpä ding ka hi” ti lunggel nei khel puana. Zia ban a chun, Jesu chun, “Zakai, tuni la In a hung tung ding ka hi” ti’n ei gen ina ti suangtuana le nei khel lo ding ahi. Ahinla, “*Zakai, hung kum kin-gang in, tu’ni hin la In ah tung ding ka hi,*” Jesu’n a vak timai chuh, Zakai le kipak ma ma hi ding ahia; bangma dang gen talo in, Kintakin a kum a, kipak tak in a tunsak tai.

Jesu’n, “la In ah tung ding ka hi” a ti lai in Zakai in paulap bangma a bawl pua lungthim kihong tak in Jesu a In ah a la lamtua hi. A mu nop pen Jesu mu ahi tak ziak in, a gen masak ding leh nunung ding kichu mai ding un ginchat a um hi.

Tuni hin nang leh kei hinkhua a le Lalpa Jesu’n, “La lungthim sunggil ah ka tung nuam hi” ti’n ei ko zing hi, bangtin I dawnhu diam? Paulap ding tamtak um maleh Zakai guala kipak tak in I tunsak thei diam? lungthim kihawng tak a kipedawkte kiang ah Lalpa a thanuam diak sek ei vei.

### **III. Jesu tawh a kituak zaw nung hinkhua:**

**1. The Confession/Kiphuanna (19:7-8).**

Lalpa Jesu tawh kituak kha zosia hin danglamna a nei chiat sek ui. Damlote le Ama tawh kituak khate chun damna a chang ua, thithabuak vop te le sukthian in a um ua, mithi le kaithaw in a um uh hi, chuleh a dang tamtak genbe ding a um hi. Zakai le mite mitmu ah kidak um tak, papna tawh kithua ah sum leh pai negu, sia dawl hinkhua mang zing himaleh, Jesu tawh a hung kituak phat un danglamna a nei ngal mai hi. Ama leh ama gilo ahi zia a hung kihedawk a, tichun a lung ahei ngal hi. Jesu kiang in a kiphuang a, thilpha bawl ding in a kisa zawm ngal hi. Lalpa Jesu tawh a kimuu chu thakhat in a hinkhua a danglam in, “Lalpa chomkhat hung kigel nalai ka” ti kampau bangma a nei puai.

Zakai min “thiang” kiti kha a tak tak in a hung guitung ta ahi. Zia chu Jesu tawh a kituak ziak bep uh ahi.

**2. The Confirmation (19: 9-10).**

Lalpa Jesu ma ah a hung kiphuang phat in, Zakai chung ah Lalpa kipâk ma ma hi ding ahin, “Tu’ni hin zia In ah hin hukdamna a hung tung tai, ama chu Abraham chapa ahi” a tia Lalpa Jesu’n namdetna a bawlta ahi. Zakai hi mi vangpha a hi na lawm lawm e! Hukdamna le a chang a, Abraham chapa hina le a chang hi. Jesu’n, “Tu’ni hin zia In ah hin hukdamna a hung tung tai,” ti hi vang ma ma ahi. Lalpa Jesu kamsuak ngei ah namdetna chang Zakai chu vangpha tak ahi.

**3. Minthanna doi umlo chu minthanna pha a hung suak tai:**

Zakai mite’n a hetnau chu sia la sektu, negu sektu, tualthat, a nam mite suak tite a la hi. Minthanna doi umlo tak chu ahi. Himaleh, a hindan kha a hung kilebul ta, napha sepna’n a hung mang zaw tai. Bible ah Zakai chanchin mu in a um kit tapua, sedawltu’n a pang kit tai tile het a hi diak ta puai. A bawl taklo ziak himai ding a hi.

Bang gual bawl khialna nei in minsiatna nei maleu Jesu tawh kituak ah muchiante chu a hindan a danglam tei sek hi. Paul kha le Jesu tawh a kituak masang, a muchian masang a khan gingtute hi’gentheitu in a pang a, himaleh, Lalpa Jesu tawh a hung kituak ua a muchian phat a

khan, a hinkhua kha a hung kilebul ta ahi. Minthanna doi um a hung suak ta ahi.

Zakai ki hetchianna hi lungthim kihong tak a Jesu a la lamtua ziak hi in hiat thei ahi. Alangkhat in Jesu tawh kituak kha zosia'n danglamna khat bek a nei tei sek ui ti hiat thei ahi kit hi. Lalpa Jesu tawh la kituak kha ta em? danglamna bang gual la nei em? Lungthim kihong tak a Lalpa Jesu lamtua thei nailo la hi kha em? daltu um zosia paithak hun ahi tai.

Zakai guala lungthim kihong tak a Jesu lamtua thei ding leh ki hetchianna diktak nei a danglamna neithei ding in Lalpa'n simtu zosia maljawl ta hen! Amen.

-----

## **KOCHUAM HI KUA AH AHI EM**

*By: Rev.Dr.Khupkam Vaiphei*

“Zia hi ka hun hil belap ahi, nang Peter chu la hi, ahin, zia suangpi chungah hin ka kochuam lem di ka hi, tichun, mithi khaw kulkawt chun zo thei ta him him pua“n a.” Mathai 16: 18.

Tulai a hin kochuam sung ahung buai sekna leh kikhenna a hung um sekna hi, kochuam hi kua ah ahi em ti ahethian lo ziakun ahi ti ka gen nuam hi, ziak a chun zia thupi chu mang in thu tawmcha ka hun gen nuam ahi. A ziak chu, kochuam kiti hi eimau mihiamte hi ihu in, zia mihiam te chu kigawm khawm in kochuam te ti in ila gen sek ahi, mihiam te hi lalpa“n athisan in a chawkw sate ahi tâk zia kin kochuam te hi ama Lalpa ah ahi ti hiai tiu. Pathian thu Bible i sim chun hiti hin akigen ahi, Pathian kochuamte, ama thisan ngeiah a lei sate chu vak dingin, nang haw leh la gangualteu chungah chun chingthei un, Thagau Thiangtho chun amau haw chu entup zing dingah a hun kawite chu la hi ngal ua. Ti ahi. Nasepte 20: 28 kuapawl hi ziang lele, kochuam ah

pang/ kochuam ah umte hi Lalpa<sup>n</sup> a enkawl dingah ei kaw i te ihu ti aki chian ahi. Upa leh Pastor te kin ding bep in gel kinla, Thagau ah piting te zosia huap in gen thei ahi. nangle thagau ah piting la hi nâk chun, mawpuakna tûn tutalo le chunle kochuam enkawltu khat la hi ti la ki pawm ding ahi. ahinla kochuam Upa leh Pastor te lamkaite thumatlo ah, amau thu umlo ding tina hilo in, amau tawsawn tu ding la hi zaw ahi.

Bang zia ah kochuam leh pawlpi sungin kikhenna leh kimu thiamlona um kha sek ahi em iti chun, kochuam lamkai/hotu a pang kha te chun zia a umna kochuam a et kaw l te chu ama ah, aman akisiam, akichawkdawsa gual ah gel in, bang hem tia kum ahung tunga, apuakna hun aki chai ta, midang in ahun puak phat tak le, ama neisa, min alak piak dan gual ah gel in, pawna ma ma in, kochuam te hepi sang in May – June 2021 Zion Thusuak 3 kochuam puitu thakte lawsapna ding ahem, min siatna ding hem ngaitua in, mipi te khan ama thu him him manglo ah ama zawk eiki dawng henlang, mawpuakna atuklai gual in keithu hile ti in lunggel ahun nei khak sek zia ah un kochuam chu hung buai khasek ahi bo hi, zia chu melmapa setan policy ahi lam aman ki hetlo maleh ama kha setan ah ala hisek hi ti kigen le kigen khial lo ding ahi, ahinla aman ngai nuam puana.

Unau, kochuam sung a hin mawpuakna la tuk inle, la tuklo inle, kochuam hi Pathian ah ahi ti he chian le chun pha pen ding ahi. Mawpuakna tichu, chairman, Secretary, Treasurer, Finance leh Vice-chairman, Asst.Secretary tite panmun hi mipi dawisakna changa mawpuakna tûk dan inle kigel him him kin, ziagual lunggel chu ahi diklo hung kipatna. Pathian in ama kochuam enkawl dingin eiguat ahi ti lunggel in nei ding ahi. A chutilo chun, midang in nangpan mun te ahun tûk phat le Pathian in a guat ahi, kochuam kiti hi ama Lalpa ah ahi zia kin aman aguhat ahi ti theilo ding la hi, mi dang in mawpuakna atûklai inle Pathian kochuam a dingah sem ahi, kenle kaki thuapi ding ahi ti ah, mawpuakna neite tawsatna lunggel lanei thei chun Pathian kochuam hepi leh lungsia hithei ding la hi, i umna kochuam hi Pathian ah ahi la ti thei lo chun mawpuakna tûk te chungah engsiatna, mudana nei ziang thei ding la hi ti hemil him him kin.

La umna kochuam a chun thamuanna laneithei ngai ahi, hiti hin Bible ah kigen khat a um hi, “Tichun, Juda gam zosia leh Galili gam leh Samaria gam ah kochuam um zosiate chun thamuanna ahun neithei tau a, Thagau Thiangtho ah thamuanna nei leh Lalpa lau tak kawmin a hung khawsau a, a hung pung hiai hiai ua.” Ti ahi. Nasepte 9: 31. Min Pathian hing diktak amu in ahile ama chun thamuanna leh kipakna anei tei sek in ahi, nang la umna kochuam in la kipak na em? La kipak lo chun kua la ngaw diam, Upa pu maw? Secretary pu? Pastor pu? Mihiam hi kuama apha ki umlo, chuleh abukim le ki um diaklo ahi ti bible in agenkha la hetlo chun mi diklona leh phatlona hun musak 4 Zion Thusuak May – June 2021 intin nangma suchau leh su hatlo tun pang ngal ding ahi, ahinla zia la hatlona zia ah Pathian a dingah nasep pha sepding bang zat hem haisan la hi tâk di zia kin, zia la seplo nate kha mi dang chung a maw khuksak theilo ding la hi ti le lahet di ahi. Mitin in eima sepdan dungzui ah mu chiat ding ihu ti bible in agen ahi , “Pathian chun mitin amau thilhi dan dungjui chiat ah hun dit ding ahi ngal ah.” Ti ahi. Rom 2: 6. Kochuam neitu hi Pathian ahi ti he chian leu hen hiti lawm lawm in kochuam thu ah/ pawl thu ah kibuai keilo ding ahi. tu ah buaina kati hi kua pawl inle umchiat in kamu, apawl apawl ah kochuam buai kitina mun kochuam haw khu ngundeu in vak khual le chun, panmun/mawpuakna neite zia leh, Khaw Hausa leh puitu khenkhat te zia k hitei tei sek ahi.

A tawpna ding in Kochuam kiti hi Pathian ah ahi ti pawm hitiu in, mimal ah ahi pua, mimal phatchuamna ding le ahi diak puai ti he chian in, kua mawpua/ lamkai in pang ta ziang lele panmun tûk te zia kin lung himaw na him him nei ta puai tiu. Panmun te hi Pathian piak ahi ti in pawm ding ahi. la pawm thiamlo chun achâng le chapona um intin (teldaw lahi hun in) a châng le kingaisiatna um in a (tel la hilo hun in) nang ma ah la thagau lam hinkhua hun sukha thei ahi. Bible i sim chun hiti hin ati ahi, “Lunggil hi thil zosia sangin thep hat pen, se huaisia pen ahia, kua hem hethiam thei di?” Jeremiah 17:9. Pathian panglo in chu lungthim ah suangtuana hung umte hi apha um bek beklo ahi, zia k a chun Jeremiah in kua hem hethiam thei ding ati ahi. Pathian dawigual tak in kocuam sunga hin pawmdan thiam tak in pan la khawm chiat hitiu unau te.

Lalpa“n athu kigen te le iki hil naute hi pawmthiam thei dingin athak in hun malsawm ta hen. Amen.

-----

## **INKUAN HINKHUA AH NUTE/ZITE**

*By: Neoshi, Bewlahland*

Khawvel ahin Nute/Zite tampi um maleh thagau ah muanpi tak tak thei ding Minu/Zi atam tapuai kiti leh kigenkhial lo ding in ka gingcha ahi. Ahin Taksa leh Thagau ah Inkuan hinkhua ah Nute/Zite a poimaw dan te hi a tam in taksa thiamzilna lam inle Nuten pan alak lo leh alaw sam ding tampi a um in, ziagualmachun, thagau lam inle Nute pan lona bangma lam taphawt ah aki hat zo lo dan igen nawp ahi. Insuang ah taksa an ah inekte hi inkuan ah inek khawm theilo a tam ta luai.

Amasapen in Numei in Pawsal chuh a luchang ahi a hetmil lo di ahi. Numei Pawsal nei taphawt chu a tek tiang a leh Mo hi zing ahi. India gam ah Numei za-um tak Sushma Swaraj in a gen na chun, ExUnion Minister, Member of Parliament chun office apat inlam ka zawt phat leh Minister ka hina ka kawi than Mo hina, Zi hina leh Insung Nu hina taw in ka lut sek hi ati’ agenbe na a chun, “ka Pawsal in politician a mamaw puan, Zipha a ma maw hi; ka chaten Nu minister ama puau in, Nu pha ama muau hi, ka tekpin minister Mo a ma maw puan, mo pha ama maw hi’, ati. Ka tekpin keima khut ngei ah siam khel khel nek le chak a du chuam hi, a dawil gual gual leh a ti gual in ka siam piak in ka pia zing hi a tii. Ahileh zia thusim ah I gen uh Sushma Swaraj hi bang gual Minu/Numei lawm lawm ahia, atekpin ama khut ngei ah a siam sa nek leh chak a du chuam, a thangai chuam a hi diam? Sushma Swaraj thusim chawmcha isim a pat ivak hetthei leh I zil thei chu ahileh, Sushma Swaraj numei nu hi mi kineu sak, ama leh ama kingai tawm a hi dan chiantak ah hetthei ahi.



Chun, eima Insung ngei inle ama gual ah Mo/Minu ama leh ama kingai tawm hi tekpi tam tak in I gam sunga a ngak la zing khat chu ahi. Sushma Swaraj cha numei te chu bangtik lai inle a tekpi sugenthe Mo hita lo ding ahi.

Martin Luthar in, ka zi ka Inn hawilo phawkbawkw gual mai hih Paradise a suak sak hi atin, nang insungah Mo/Minu in nang insung chu bang gual insung la suak sak em? Thupilte 31:10 in ziate hin a gen kit ahi, Zipha chu kua ahem mu zo ding? a ki tin. Nang Mo/Minu tuni hin ki en chian thak tiam in. la pawsal a ding ah Zipha la hi na em? Proverb 31:29 a chun, "Numei khawsak dan thiam tam tak a um ui, himaleh, nang hi la pha chung chuang pen hi" a tia. Tunu minu nang hi la pha chung chuang pen nam? ki enchian in! Proverb 12:4 Numei umchanpha chu a pawsal lallukhuk ahi, akitin, tuni nang hi la pawsa lallukhuk chu la hi tak tak nam? ki en chian in nang mini. Tulai ahin numei ching atam tan ama bep aki ngai sang zia in Insung ah buaina tampi atung tan, tuni nang minu/monu la insung chu Pathian pawm tak leh Insung mite pawmtak ah pil la hi nam ki enchian kit in, Insung hinkhua nuam chuh vangam teplawkna ahi, Insung hinkhua nuamlo chuh meidil tawh bang ahi. Pathian in Nu hung hi ding te leh Nute zosia Nupha a Zi a chate kineppi thei ding in hun malsawm taken.

-----

## **Report chuam chuam**

*By: Rev.Dr.Khupkam Vaiphei*

### **(A) Frontline Kangvai mun vena report**

A chiata tarik 19<sup>th</sup>-July-2023 (Wednesday) ni khan RCG Hq apat Pastor te sia taw Vice- Moderator Upa Jangthang malatna in Kangvai frontline duty te vethakna ava kinei in, ziani hin amun in 11:50 am vel in katung un, amun ka tung un RCG HQ min in Biscuit Packet 3 (2160piece) piakdawna le ka nei ngalun ahi. Ziani hin VA Chairman Pa K.Chung mapuina in ZRA Kangvai frontline Commander pu le alawite taw RCG palaite kimelhetna leh ki vaidawna hun amang in, zaw in Rev.Dr.Khupkam Vaiphei in Kangvai frontline Commander Pu Muan leh a lawite chungah leh Tribal Volunter te chungah kipak thu genna leh Pauchappiakna hun amang in, zaw in HYA palaite taw hun matkhawmna akinei kit in, zaw in Rev.Pauneu in zia kimatna hun khakna in pauchapna anei in, zia zaw a chun Pa K.Chng malatna in boundary ah duty post bunker kisiamte vethakna hun akinei in, atawpna in P/Pastor St.Lianboi in pauchapna nei in hun zosia chu matzaw ahi ban in a chiakhawm te taw VA member te group limlakna station ah nei in kikhenna chibai kipia tua in damtak in ka hung kile kit tau in ahi. a chia khawm te 1.Upa Jangthang vice – Moderator RCG, 2. Rev.Dr.Khupkam vaiphei Executive Secretary, 3. Rev. Pauneu, 4. P/Pastor St.Lianboi, 5. Upa lalboi, 6. Pa Thanga, 7. Nu N.Hoiling (Naulunnu) 8. Nu Hatling ka hiu in ahi. amun ah Bialtu Pastor Rev.Liante tawle kimu khawm in phat chawmkhat ka um khawm un ahi. group Photo cover page ah muthei ahi. kakipak hi Lalpa'n Nam sepai te leh Volunteer te umpi in vengbit zing ta hen.Amen.

### **(B) Phaikhothang RCG kochuam umte vethakna report**

Tarik 22<sup>nd</sup>-July-2023 kiginni khan Phaikhothang ah RCG kochuam tunding ding lam etjing kawm in inn 8 um te kiangin kochuam ah matding Register bu, Cash book, Receipt book, leh khuang lui Hilltown Kochuam ah matsa ala matvak dingun Vice-Moderator RCG malatna in piakdawna ava kinei in ahi.

**(C) Kipak thugenna leh kochuam mipi te kianga hetsakna**

Igam ua Buai hung kipatni 3<sup>rd</sup>-May-2023 kipat ah Biakin leh inn hung kihal tha gam in chenna khuamun ale um thei ta lo nungah galzam hinkhua hun manga, Kangpokpi lam leh Lamka lam munni in iki khawl khawm gam tau in, zia kawm kal a chun kochuam ah mi Pa gin um Nu gin um khen khat in a umnau kochuam umta lo sawmah khat piakna ding hetalo gual ah um a um zing lai in a sawm ah khat u direct ah RCG Head office mun ah hun submit humpia thei khen khat te chungah kipak thu igen ban un ziagual ah mimal sawm ah khat hun pia zingthei te amin ule a umnau khua/kochuam min utaw ka hun taklang nuam in, zia a chun mitin in eila hethiam dingun ka hun chial ahi.

Chun, maban ah kua tawbang pia nuam ah piakna ding hetlo zia ah hun piathei lo te khan mission account, ahilo le mimal account inle hun thawt zing thei ahi.

**I. Mualkonbung apat**

- 1) Upa A Mang
- 2) Pa Paulian
- 3) Pa Paulal
- 4) Pa Paulun
- 5) Pa Paukhup
- 6) Nu Johnhing
- 7) Baby Lianminlun

**II. Gawtangkawt**

- 1) Upa lalboi
- 2) Khupthian
- 3) Nk.Tingpi
- 4) Nu Doinu
- 5) Nu Tingcha
- 6) Pa Khuplalven

**III. S.Kanan**

- 1) Upa Nekkam
- 2) Nk Lonlei
- 3) Tv.Manglawm
- 4) Nu Hoinu
- 5) Nu Paknu
- 6) Pa Mosi
- 7) Tv.KamJohna
- 8) Pa Goulian

**IV. Zordanphai**

- 1) Pa Kaplun

**V. Nakhujang**

- 1) Upa Khailiankham

**VI. P.Gamhawi**

- 1) Upa Minlian
- 2) Pa Sasang

**VII. Kangvai**

- 1) Upa Kailiandou
- 2) Pa Nengkholel
- 3) Nu Tingnei
- 4) Nk.Thiankim
- 5) Nu Hoilam
- 6) Nu Sangi

**VIII. T.Munjang**

- 1) Pa Thangminjohn
- 2) Pa Thanglallian
- 3) Pa Liantinkhup
- 4) Nu Niangnei
- 5) Pa Lianboi
- 6) Nk.Hoilem
- 7) Nu Thianhat

Zia a chung a min hung kisulang te zal in mission chialai lampi buaina umlo in akichia tha zelthei ahi ti mu leh het ahi ziakin, laleng ua chungin pawlpi sikin kipak thu avel in ka hun gen ahi.

-----

**PAUCHAPNA HIAT DING TE**

1. I gam uh buaina kipat chamna leh muanna umthei na ding in.
2. Thingtang mi ten tup leh doi I nei teu I mu thei na ding un.
3. Kochuam chia lai lampi a chia hawizel thei na ding in.
4. Frontline ah pang te Pathian hatna suang ah muang leh bit tak ah a um thei na ding un.
5. RCG General Standing 3<sup>rd</sup> Week September 2023 ah mat ahi thei na ding in.
6. Relief Camp ah damlo te ahung dam theina ding un.
7. Gam leh Nam puitu te kipum khat tak ah pan alak khawm zing theina ding un.
8. Pastor leh Ho Lamkai te zosia lungthim munkhat ah dingkhawm ah Thagau mangthai ahun puidaw thei na ding un.

-----

---

## **H E T S A K N A**

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

- ❖ Account Name : Revival Church of God
- ❖ Account Number : 11343704608
- ❖ Bank Name : State Bank of India
- ❖ Bank Branch : Churachandpur main branch
- ❖ IFSC : SBIN0006182
- ❖ Branch code : 6182
- ❖ MICR Code : 795002504

### **ZION THUSUAK LIFE MEMBER**

- 1) Upa Songlianthang Vaiphei

### **ZION THUSUAK PATRON MEMBER TE**

- 1) Electeded Upa Lalthang, Pakeng veng
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi Vanghoiphai
- 5) Pu GL Muana Neitham, Gochinkhup veng
- 6) Upa K.Kama HQ veng
- 7) Pu SL Kamlal Vaiphei, L.Vaiphei veng, Imphal
- 8) Upa Singlet, B.Phaicham

- ❖ Life member dingin 5000/- ahi. -Editor, Zion Thusuak Board
- ❖ Patron members kum 3 (thum) 2020 apat Rs 1,000/- hita ahi.

**COLLECTOR/MAGAZINE AGENT:**

- |                     |                    |
|---------------------|--------------------|
| 1) Tv. Douminlun    | Hilltown           |
| 2) Tv. Lalroman     | T. Munjang         |
| 3) Pa Paelim        | Kangvai            |
| 4) Upa Tongjang     | Imphal             |
| 5) Upa Khailiankham | Nakhujang          |
| 6) Upa Manglun      | S Elimphai         |
| 7) Upa Liankhai     | S Kanan            |
| 8) Pa Mangminlun    | Gawtangkawt        |
| 9) Pa Khamneu       | Heirokland         |
| 10) Tv. Hauginlian  | Bewlahland         |
| 11) Upa Mamang      | Mualkon            |
| 12) Upa Nekpu       | Zordanphai         |
| 13) Pa Ts Boipu     | Mantripukhri       |
| 14) Pro Pastor      | Lianboi P. Gamhawi |
| 15) Upa Lalla       | L. Vaiphei Veng    |
-



Kangvai ah  
Mission  
Lawiupa ten  
frontline ah  
pang te a ding  
refreshment  
piak pet limlak



Phaikhothang ah Kochuam te mat ding Khuang leh Cashbook,  
Register, Labu leh adang dang Upa Jangthang, Vice Moderator in  
piakdokna nei pet lim



Frontline, Kangvai VA te toh limlakna

## BOOK POST

RNI Read. No. 34293/80

7a,

.....

.....

Stamp

*If undelivered please return to:*

The Editor  
**ZION THUSUAK**  
RCG Head Office  
Thangzam Road, Hilltown, Churachandpur, Manipur  
PIN – 795128, P.O. Box No. 91  
Email: [rcgmission@gmail.com](mailto:rcgmission@gmail.com)  
Website: [revivalchurchofgod.org](http://revivalchurchofgod.org)  
Contact: +91 9612652209 (Exe. Secy.)